

東
華
續
錄

東華續錄

同治三十

臣王先謙敬編

臣張式恭恭校

同治三年甲子春正月癸卯朔元旦節 慈安皇太后 慈禧皇太后御慈甯宮 上率諸王大臣行慶賀禮 御太和殿受朝作樂宣表如儀○停止筵宴○甲辰左宗棠奏餘杭踞逆於西北門外修築濠壘與城賊相犄角十二月初三日各軍三路進剿該逆由西北門出悍賊千餘東北門外村房內出賊數千分股迎拒黃少春等督率各營苦戰竟日共破賊三大壘擊斃悍賊數百名其東路倉前等處爲通杭州要路賊於太平橋一帶築壘與倉前之賊聯絡一氣康國器於初三日派吳光亮等進攻連克四壘首逆汪海洋率黨來援復經吳光亮等截殺斃賊六七百名該逆自此

次擊敗後勢愈窮蹙堅匿不出我軍若乘勢偏攻往往爲其槍礮所傷非取遠勢包圍絕其糧道不足制賊死命臣卽日進駐餘杭之橫溪頭相機進剿以期迅拔堅城其蔣益澧攻杭一軍已分紮錢塘湧金等門褻賊中央惟地勢太寬兵力不敷分布臣已將徐之秀駐紮橫溪頭五營調歸蔣益澧一處併力規杭其水師劉連陞等營於初五日進攻清泰門外觀音堂賊壘將附城房屋燒毀劉培元復飭蔣榮彩等擡水師舳板戰船由錢江入西湖奪賊礮船三號小划船十餘號斃賊多名平湖乍浦海鹽之賊俱已投誠海甯州城賊酋亦有獻城之說蔣益澧委陳思燭前往辦理如杭州各屬以次收復漸漸移軍西向則杭賊勢孤自亦無能久踞見在杭州餘杭兩城必須有一先下則全局皆活嘉湖兩郡乃可次第肅清又奏臣維逆賊起事各渠魁之最悍者均已次第殲除以

見存悍賊而論惟李秀城與李侍賢而已蘇州未復之先李秀城

已遁回金陵聞有欲挈洪逆出走之說

臣

處相距稍遠未得確信

然當徽池肅清之時揣度賊勢必以皖浙爲逃竄之路

臣

前經咨

商曾國藩皖軍由甯國進廣德以力扼東壩浙軍由昌化於潛進

孝豐以規湖郡准曾國藩咨覆廣德撫局未成各軍分扼城隘別

無大支勁旅可以進剿廣德不克與浙師聯絡相應

臣

以皖軍既

未能進剿廣德則浙師由於潛昌化以進孝豐既有兩面受敵之

虞且皖浙交界各縣久遭蹂躪人多流亡不但無米可買且轉運

亦極艱難非先取餘杭軍食無從轉饋孝豐安吉之賊均以食盡

自走所存賊卡寥寥官軍不難剿賊而難於久駐是浙師亦不克

與皖軍聯絡相應不得已乃畱王開琳一軍三千三百人仍駐徽

州之屯溪鎮伺賊所向截之而令黃少春代統劉典所部會攻餘

杭俟餘杭攻克乃可規德清以通水運賊如由湖入浙臣力或能

制之惟王開琳老湘營全軍雖在皖屢立戰功究以力薄勢孤難

當巨寇如果李秀城挾洪逆以來能否邀擊得手實無把握疊接

曾國藩緘牘言布置皖南所屬貼近江西各城此外別無大支遊

擊之師臣已屢次函商請其注意廣德以見在局勢言之金陵賊

勢甚蹙覓路逃竄本在意中縱洪逆戀其巢穴誓以死拒李秀城

李侍賢等未必肯束手就戮縱李秀城李侍賢等肯束手就戮而

夥黨尙眾亦必覓路紛逃況見在句容溧陽廣德一帶均尙爲悍

賊所踞賊之必由此路逃竄殆無可疑設由廣德州竄入皖南腹

地雖無糧可掠無人可擄然果晝夜疾馳不數日即可出險恐終

成不了之局曾國藩慮無大支遊擊之師意或在此然見在賊勢

蘇州旣克杭州之圍正急悍賊鄧沆明旣誅陳逆炳汶汪逆海洋

均在杭餘兩城自救不暇海鹽平湖又已收復其海甯嘉興之賊不足爲蘇州之患也是李鴻章所部可緩攻嘉興其踞常州之逆爲陳坤書李鴻章旣言其不甚耐戰自無能爲暫舍此不攻金陵一破常州亦必應手而下是李鴻章所部可緩攻常州惟溧陽一縣爲各逆眷屬所在守賊李侍賢又狡悍素著賊如思竄必假途於此李鴻章如派得勝之師由無錫移軍急攻宜興溧陽西北與曾國藩溧水守軍互相聯絡縱溧陽未能卽拔而此路要可無虞賊縱由溧陽衝出與廣德之賊合夥李鴻章之軍猶可跟蹤猛追不令免脫較之空此一路任賊竄過自爲勝之曾國藩力持堅守之議見在布置皖南江西一帶防兵固爲老成之見然賊知我以堅守爲主必不攻各將以堅守爲事必不戰儻賊舍城不攻從間道疾馳而過恐調撥尾追亦有所不及何如厚集兵力扼廣德建

平東燭要隘與李鴻章一軍互相聯絡之爲得乎至江西距賊稍遠爲饒廣計均宜以嚴扼昌江力保上游爲主如婺源祁門石門諸處是也苟兵力有餘則仍以遠防廣德州甯國爲要懇請飭下曾國藩李鴻章沈葆楨酌議可否李鴻章奏侍護諸逆分踞金壇溧陽丹陽並常州城內添賊數萬又在奔牛四面紮營數十座李鶴章抽撥吳超凡等營復挑選洋槍隊繞赴李士橋與劉銘傳等會剿十二月十四日我軍分三路進劉銘傳率董鳳高等以炸礮轟其閘橋頭營兼護浮橋郭松林率吳建瀛等由上數里攻其東南黃中元等由下數里攻其西南密飭奔牛守營之唐殿魁等衝出夾擊賊眾二萬餘迎拒我軍排槍猛進三面撲入先破東面大賊營聚殲其眾西面賊營驚亂皆奪門走黃中元由後截擊欣斃無算對河各股賊匪拌命來拒曹仁美帶選鋒數十人梟水傍船

連拋火彈立將忠逆所購輪船焚毀劉銘傳督隊向奔牛猛衝賊分股三四萬繞後圍撲郭松林折回以馬隊突入賊陣賊眾各鳥獸散不及歸營徑向奔牛丹陽一路遁走唐殿魁等分路追擊十餘里連破賊營三十餘座計擒斬溺斃賊眾約近萬人奔牛之圍立解查奔牛一鎮爲鎮常交界衝途該降眾投誠後劉銘傳卽派唐殿魁等二營冒險進紮而忠護等逆死護金陵老巢後路併力糾集各巨股窺我兵單重圍困裹用輪船炸礮力爭此地此次官軍以四千餘人當十餘萬狂寇力戰解圍實足寒賊膽而除後患其尤爲出力之總兵唐殿魁等相應先行開列懇恩獎勵其餘出力員弁及陣亡將士容臣查明彙請獎卹前據曾國荃函稱李秀城前夜出城向句容竄去復據擒賊供稱圍奔牛時李秀城亦在其內見飭李鶴章劉銘傳相機圖攻常城仍防忠逆同援上諭

議政王軍機大臣等奔牛一鎮爲鎮常衝要李秀城李侍賢等巨酋方以死力護金陵老巢後路糾集大股圍困唐殿魁等新營並用輪船炸礮力爭其地官軍以少禦眾勢頗危險竟能力解重圍焚其輪船所辦尙好李鴻章既據曾國荃會李秀城由金陵出向句容而去又獲賊供圍奔牛時李秀城卽在其內是此賊猶恃其狡悍必欲爭此要衝以爲竄走之路李鴻章見飭李鶴章劉銘傳等相機圖攻常城並防忠逆同援著卽妥籌兼顧平湖乍浦海鹽之賊俱已投誠海甯州賊亦有獻城之說杭賊勢孤左宗棠已進駐橫溪頭督剿餘杭與蔣益澧攻杭之師必須有一先下嘉湖乃可次第肅清卽著督令所部迅圖攻取該督以賊中狡悍惟餘李秀城李侍賢同惡相濟所當併力亟圖見在蘇州已克金陵杭州均圍攻緊急賊勢必以皖浙爲逃遁之路廣德撫局未成曾國

藩所部不數分兵進剿左宗棠畱王開琳一軍仍駐徽州之屯溪
鎮究恐力薄勢單如李秀城果挾洪逆由此路突出恐不足資扼
截而見在句溧一帶賊踞甚堅溧陽更爲賊之眷屬輜重所在李
秀城李侍賢復併力於此官軍獨唐殿魁等各營僅守奔牛一鎮
頗覺空虛曾國藩左宗棠等老謀均不急求旦夕之功而欲併力
聚殲使賊不得鋌走所見本同卽李鴻章疊克蘇錫各城此次與
賊力爭奔牛亦必能識此意惟常州攻擣勢在垂克恐不能復令
各軍舍而他圖常賊雖不耐戰而守亦頗堅若不速籌攻克保無
別生枝節李鴻章諒有成竹在胸左宗棠此奏謂曾國藩亟應分
兵以取廣德力顧東壩與浙師聯絡李鴻章亟應由無錫攻宜溧
使賊不至由此路鋌走自屬確有所見著曾國藩左宗棠李鴻章
沈葆楨悉心商酌謀出萬全爲東南半壁一勞永逸之計江省之

防據左宗棠奏以嚴扼昌江力保上游爲主昌江係屬何水著沈葆楨嚴密布置與皖境浙師相爲策應並遵前旨將饒信兩防各軍妥爲調度豫籌堵截奔牛降人前據李鴻章奏係邵小雙此次所保之邵之倫請賞加遊擊銜是否卽係其人見在該處守禦緊要該降人等是否出力可靠著李鴻章查明具奏將此由六百里各諭令知之○乙巳諭議政王軍機大臣等前因滿慶恩慶奏稱呼徵捏詞誣控並勦辦瞻對及委員妄稟等各摺片當經諭令滿慶等以呼徵捏訴各語萬難憑信令其傳知李玉圃迅速赴京質對並曉諭明正土司安站通道糧買嚴清榮撤回川省查辦矣呼徵失察堪布剋扣布施不能秉公辦理致令藏中滋事斷難復令同藏所控情節亦難憑信汪曲結布旣爲藏中僧俗所服卽著滿慶等責令協同達賴喇嘛掌辦藏務令其撫輯僧俗務使各寺相

安永息爭端不准區分黨類恃強凌弱再行滋事儻能全藏底定
尙當破格加恩所有時微前控各情並著毋庸查辦此係朝廷爲
安輯全藏起見特降此旨卽著滿慶等傳諭汪曲結布知悉令其
益知感激倍加奮勉前據駱秉章奏瞻對匪眾見已回巢此時所
調藏兵自毋庸再行進剿以省兵力而示體卹著滿慶卽將此項
兵丁撤退仍歸藏地本境毋庸越境會剿並著崇實駱秉章飭令
史致康派撥兵丁查拏夾壩以次疏通驛路前據滿慶等奏稱李
玉圃在川候補十年未得署缺並聲敘該員勞績請破格錄用當
以該員見辦軍務俟有成效再行奏獎見在瞻對旣無須進剿著
滿慶等卽將該員前次勞績查明會同崇實駱秉章福濟景紋保
奏令其赴川由駱秉章送部引見並由駱秉章察看該員才具酌
量委用其嚴清榮被參之案卽著福濟等將該員撤回內地查辦

其明正等土司仍由滿慶等曉諭令其照常安設驛站呼徵事見在雖可毋庸查辦瞻對土匪回巢能否與明正等土司日久相安及洋人傳教能否阻止各節事關緊要福濟曾任封疆辦理較滿慶等更當老練福濟到藏後卽幫同景紋將該處實在情形辦理一面迅速奏聞其福濟行止著俟藏務辦竣後再行請旨滿慶本係任滿赴京人員著仍遵前旨啟程回京福濟等仍遵前旨迅速赴藏毋稍延緩將此由六百里各諭令知之○諭崇實駱秉章奏密陳西藏情形請權宜辦理一摺據稱滿慶李玉圃汪曲結布互相固結李玉圃慫恿滿慶蒙混具奏以汪曲結布掌辦藏務復奏請將李玉圃破格錄用汪曲結布奏書中復力剖滿慶李玉圃之寃並滿慶李玉圃藉瞻對天主教爲名種種欺詐要挾請暫籌權宜辦理等語滿慶等挾私懷詐把持藏務已成固結難解之勢非

權宜辦理不足以釋藏中之疑而離其勢滿慶等寄諭內仍將崇實駱秉章福濟景紋四人銜名敘入以釋滿慶等疑慮著崇實等催令滿慶李玉圃迅卽來京並曉諭汪曲結布令其撫輯僧俗毋令再生事端儻能全藏底定尙當破格加恩俾免疑懼仍曉以前次加恩係出自特旨非由滿慶等奏請以散其固結之心一面催令李玉圃迅速來京催滿慶等到川再將李玉圃押解赴京羅勒拏於道光年間旣已入藏彼時未經藏中驅逐此時弛禁之後藏中僧俗未必卽致驚疑滿慶等前奏藏中因洋人傳教人心惶惑是否實在情形著福濟景紋於到藏後查明酌辦瞻對土匪前已回巢且係滿慶李玉圃藉勦辦該土司爲名虛詞恫喝爲要挾固結之謀卽著福濟等飛速行又將滿慶等前調藏兵撤回毋庸越境會剿以弭邊釁仍著駱秉章等飭令史致康督令派出阜和協

兵五百名駐紮河口查拏夾壩並曉諭明正裏塘各土司照常安設驛站以期疏通道路惟藏中正當多事之秋此時福濟等赴藏勢更難緩且滿慶等既可由藏來川福濟景紋何獨不可由川赴藏著仍懷遵前旨卽速由川啟程馳赴西藏認真查辦毋得藉詞推諉致干重究至李玉圃詭譎異常未必肯卽行來京質對案情前據滿慶等奏稱該員自到川以來候補十有餘年在口外苦累未得一署本缺懇請破格錄用等語是其志在躁進亟圖回川署缺早已情見乎詞此次寄諭滿慶等令其會同駱秉章等查明李玉圃勞績保奏請獎駱秉章等正可行文滿慶會商酌保一面將李玉圃檄調回省令其署缺俾該員有所欣羨迅速回川以絕藏中勾結煽惑之端亦係權宜一法總之藏中之治亂惟以福濟景紋到藏之遲速爲斷如果能迅速赴藏俾滿慶等及早交卸則李

玉圖自無所用其煽惑福濟景紋當識此意趕緊由川啟程不得一味畏葸致誤大局至福濟此次赴藏仍當以幫同景紋專勘瞻對爲詞以釋滿慶等疑懼俟到藏後仍將呼微等一案暗中查明據實具奏此次寄諭崇實等當加意慎密卽將來覆奏時繕寫摺件之人亦當慎擇毋令稍有宣露將此由六百里各諭令知之○丙午諭議政王軍機大臣等多隆阿奏彙報各路軍務見籌攻剿情形一摺盤屋賊糧乏絕已如釜魚阱獸該將軍病已漸痊著俟積雪消融卽督飭穆圖善等實力進攻務將藍逆全股一律殲除以便移兵漢南與劉蓉會師進剿前據劉蓉奏川援各軍分駐靑石關梅子壩一帶屢次獲勝賊亦不復來犯惟因地勢高峻冰霰堅凝糧運不繼不得已退紮西河口等處賊亦退駐新集油坊街老巢未言賊踞靑石關要隘或我兵旣退之後賊匪乘虛踞險連

日情形若何如何進兵奪隘之處著劉蓉妥籌進紮相度機宜迅速馳奏商南股匪竄至山陽鄖西交界之漫川關著嚴樹森嚴飭梁作楫一軍會同李雲麟所派兩營分路夾擊不准再有蔓延多隆阿因兵力不敷分布請調石清吉等七營赴陝著官文等速飭石清吉等七營兼程赴陝以資攻剿陳大澐等股分擾南陽屬境潼關爲全陝門戶該將軍必須派兵嚴防勿稍疏失陶茂林一軍前據雷正綰奏接其來函有准於十四日到汧之語已諭雷正綰督軍與陶茂林前後夾擊將汧隴及靈臺崇信之賊痛加勦洗茲據多隆阿奏鳳翔回民乞撫已爲頒發告條飭總兵慶瑞前往會同分別辦理陶茂林一軍俟將撫局辦理妥協並將鳳翔北山零匪按捕淨盡再飭拔隊由汧隴取道進攻是陶茂林十四日到汧之語又成畫餅該提督前此奮勇解圍是以特加擢用宜如何勉

力殺賊藉圖報稱乃自議撫以後時已數月未聞著有成效恐爲
回匪所愚藉作緩兵之計鳳翔固守十數月之功未可敗於垂成
多隆阿旣派慶瑞前往會同辦理卽著嚴飭陶茂林等妥爲籌辦
若復稍畱後患必惟陶茂林等是問決不寬貸俟辦有頭緒卽應
迅赴汧隴會剿甘肅待援孔亟多隆阿務飭陶茂林趕緊前進毋
稍膜視麟遊北山一帶之賊催令曹克忠認真剿洗山東勇丁赴
定邊防剿俟到陝後由該將軍另揀得力將弁前往統帶將此由
六百里各諭令知之○丁未命牛樹梅來京以蔣志章爲四川按
察使

由廣東鹽運使遷

○戊申曾國藩奏自蘇州克復僞忠王卽帶數萬

人援救金陵到城已近五十日尙未猛撲官軍營壘近據李鴻章
來函聞忠逆以溧陽至饒景數百里處處乏食頗以裹糧急趨爲
難又據鮑超來牘侍逆蓄意由長興廣德甯國一帶上犯江西先

踞產糧之區以俟忠逆續至各等語竊計忠侍二逆既不能各保分地又不欲苦援金陵誠非自皖入江別無圖存之策從廣德甯邑上竄江西約有兩路西路由旌德太平石埭以竄饒景東路由昌化清安開化以竄玉山西路之防臣已派兵堅守涇旌太石青池六城東路之防必由浙境經過臣已飛咨左宗棠沈葆楨分別扼守以期節節堵遏力保上游完區其金陵洪逆老巢賊氣尙固糧食未竭臣屬令曾國荃不求速效但求穩慎以仰副聖主廬念南疆謀出萬全之至意上諭議政王軍機大臣等前據左宗棠奏賊中李秀城李侍賢二酋最爲狡悍屢欲挾洪逆出走恐由句容溧陽廣德一帶圖竄與李鴻章奏官軍與賊力爭奔牛要衝李秀城見在句溧一帶併力抗拒等情正相符合左宗棠謂曾國藩所部亟應分兵以取廣德力顧東壩與浙師聯絡李鴻章應由

無錫攻宜溧防賊由此竄走當經寄諭曾國藩左宗棠李鴻章沈葆楨悉心商酌謀出萬全以期同心合力迅奏膚功茲據曾國藩所奏忠侍二逆既不能各保分地又不欲苦援金陵非自皖以入江別無圖存之策已分咨左宗棠沈葆楨分別扼守以期節節堵遏等語與前左宗棠所奏仍是一事東南事勢方當得手尤應防賊出竄致成不了之局疊據曾國藩左宗棠等所奏謀畫均屬相同惟西路甯池太屬曾國藩分兵駐守自足以遏賊衝而東路徽屬據左宗棠前奏本有王開琳一軍駐屯溪鎮力薄勢單恐不足資扼截之語浙軍此時進攻杭州餘杭二城徽境之防是否尙能增兵廣德撫局未成辦理究竟如何曾國藩所部能否分兵力取此城以與浙師聯絡朝廷不能遙度諒該督等同矢公忠必能共籌大局以保萬全也金陵賊氣尙固糧食未盡仍當飭令曾國荃

力求穩慎相機攻取毋徒急求旦夕之功李鴻章前奏常州攻剿勢在垂克如果賊以全力併由句溧一路突竄該撫亦當豫籌兼顧分飭諸軍緊躡力迫使賊不得善脫與徽甯各防之軍奮力夾擊江省饒信兩防沈葆楨籌之有素此時更當嚴密布置著卽懷遵疊次諭旨妥爲調度毋稍疏虞皖北漸就肅清壽六一帶毛有銘蔣凝學等各軍當可別資分撥能否調赴皖南分投防剿之處並著曾國藩妥爲籌布皖北善後正當喫要喬松年身任封圻責無旁貸前據袁保恆陳奏數條不爲無見著鈔給曾國藩喬松年閱看所言是否可行抑應如何酌量辦理卽著該督撫隨時妥籌具奏將此由六百里各諭令知之○以江南水師克復九洑洲出力人員加銜升敘有差○廣江蘇興化縣學額四名湖北通山七名廣濟五名○庚戌諭議政王軍機大臣等官文嚴樹森奏鄂省

鄖襄隨棗軍務緊急驟難派兵赴豫並抽調征皖楚軍回鄖以資
援勦一摺另片奏藍逆竄踞鄖縣所屬之趙家川攻撲鄖西縣屬
之城牆堽等處要隘均經官軍團勇先後擊退等語髮逆藍二順
已由商南竄擾鄖境捻匪陳大喜餘黨陳老陽等亦由信陽竄入
隨州之小林店等處數皆逾萬而苗黨漏網之苗添慶復有糾合
宋懌詩潰匪圖竄孝感之信鄖省西北邊境警報頻仍官文等以
眾寇環聚鄂疆兵勇不敷分布將駐皖之成大吉石清吉兩軍調
回援勦自是先其所急惟隨棗德安一帶見有總兵楊朝林趙克
彭各營及烏勒喜布等馬隊前往防勦總兵王桐柏周鳳山各率
所部扼紮於隨州之馬平港黃陂縣之九子墩等處今復益以成
大吉石清吉兩枝勁旅兵力不爲不厚該大臣等以賊蹤散漫道
路分歧尙宜以靜待動固屬老成持重之見然籌防不如進勦近

守不若遠攻著卽激勵諸軍鼓勇前進迅將竄入小林店之陳老陽等股匪剋日殲除如苗添慶糾合苗黨南竄亦當嚴飭各將領迎頭剿截勿令闖入楚疆一俟楚北軍務稍鬆卽恪遵前旨飛調石清吉七營星速赴陝交多隆阿調遣以拯漢南之急該大臣等素顧大局諒能妥籌援剿毋誤事機卽屬官軍疊經獲勝近復添調唐協和助剿並著檄飭道員梁作楫等督率各營將趙家川踞匪剿滅肅清疆圉其張總愚一股業由內鄉竄往南召魯山一帶賊蹤去楚較遠楚軍自未便深入會剿著張之萬速飭張曜奮力進攻若能將盤踞山中之賊聚而殲旃固屬妥善否則偪令出險俾蘇克金馬隊得以盡其所長亦不難於撲滅該撫務將此股竄匪就地殄除毋再貽患鄰封致干重究將此由六百里各諭令知之○諭慶昫等奏防禦乘間詐賊請旨辦理並逆回攻犯滿城近

日情形各摺片甯夏步營防禦佛爾國春於逆回攻犯滿城眾鋪民上城協守之時膽敢向開碾房之周輔譌索制錢六串餘文實屬目無法紀若不嚴行懲辦無以儆貪墨而固人心佛爾國春著卽於軍前正法以昭炯戒慶昫等仍卽曉諭眾民戶一體上城協守無稍疏懈另片奏逆回攻犯滿城情形近日尤甚日夜前來附近城垣之四面村莊焚掠意在不畱民戶以斷糧米柴薪之路城頭槍礮擊倒賊匪多名惟官兵窮餓力有難支日望援兵協餉到來共保危城近五十日未得省城信息深以糧缺爲慮等語甯夏滿城情形危急萬分必得援兵協餉早到方獲安全著熙麟恩麟懍遵前旨設法接濟英桂前奏報解甘餉三十萬兩如已行抵慶陽卽著熙麟設法勻撥協濟其應需軍火等項並著熙麟一併解濟委員探明路徑解赴甯夏滿城如有可以抽調兵勇並著趕緊

調派迅解甯夏之圍並通省城驛路無稍忽視訥欽一軍由歸綏一路赴甘見已行抵何處卽著兼程前進力圖救援甯夏勿得稍事耽延致干咎戾慶昫等仍就見有兵力激勵軍民設法守禦並飛催各處援兵協餉以期共濟艱難是爲至要將此由六百里諭知慶昫常陞熙麟訥欽並傳諭恩麟知之○辛亥以孟春時享

太廟 上前期親詣行禮○壬子 御紫光閣賜蒙古王公外藩

使臣等宴並賞賚有差每歲皆如之○癸丑飭陝西湖南按月籌撥銀兩濟劉蓉軍需○甲寅諭議政王軍機大臣等張之萬毛昶熙奏攻克鮑寨並擊勦張逆獲勝攻拔息縣擒巢擒斬鄔大年副將孫之友被戕各摺鮑寨雖已攻克而匪首王廷幹受創奔竄尙未殲斃其賊寨究在何處亦未據該撫等聲明著張之萬毛昶熙查明具奏並卽督飭各軍乘勝進攻談圍將汝郡各匪巢穴次第

肅清王廷幹係著名匪首必須設法將其搜擒攻毀其巢毋畱餘孽前據官文等奏張總愚股匪由內鄉竄往南召魯山一帶浙川已無匪蹤茲據張之萬等奏張逆避兵喙伏上年十二月二十二等日道員葛承霖等引軍出趙家莊將出山口賊眾來撲勢甚凶猛副將王有明等力戰陣亡葛承霖率軍截擊斬賊甚夥追至王家莊燒毀賊營而還著張之萬督飭張曜等各率所部約期並攻務須偪賊出險以便蘇克金等馬隊克盡所長免致再傷精銳賊匪所踞溝口是否魯山南召山中趙家莊坐落何地浙川有無餘匪均著該撫等查明具奏以後奏報當將坐落州縣地方敘明以備參考息縣擒首鄔大年攻陷民寨經知州任重光調團往剿密派內應設計殲渠辦理尙爲妥速所有在事出力員弁兵勇著暫行存記俟汝南肅清彙案保獎荆子關副將孫之友所部馬

勇與敖天印勇隊口角互鬪間有受傷經署副將裴政前往勸止何以夜間孫之友卽被戕害裴政帶領營弁彈壓何至街市塞斷無隙可出及至天明始行查見孫之友屍身此等情節殊屬支離孫之友以專閫大員打仗向稱得力遽被戕害實堪駭異著張之萬督飭蒯賀蓀將起釁根由確切查明並將已革副將敖天印嚴提訊究按律重懲敖天印所部勇丁仍應妥爲彈壓毋任再有滋事另片奏請令皖營總兵宋慶帶領所部勇丁來豫助勦等語宋慶見在駐紮何處如皖北漸次肅清無須該總兵防勦卽令帶隊前往河南交張之萬調遣以厚兵力著曾國藩喬松年酌度辦理妥爲調度將此由六百里各諭令知之○于河南陣亡副將王有明等祭葬世職○丁巳諭議政王軍機大臣等張凱嵩奏貴縣官軍圍偃黃逆老巢攻破賊壘多處並鎮安府屬防勦土匪保衛邊

疆請將出力及辦理不善之員分別舉劾各一摺署歸順州事崇善縣知縣張鳴鳳平日防勦土匪尙能盡心此次於王士林練丁索補口糧不能及時籌給又不加意防範致令滋事擾害實屬辦理不善張鳴鳳著暫行革職示儆太平府團總王士林屢以戰功洊保藍翎守備於所帶練丁不能約束著先行斥革仍著張凱嵩飭令左江道督同太平府嚴提到案查明是否縱容騷擾確切究辦劉坤一所部各軍進剿黃逆老巢將覃塘及青雲硃砂楊李等村次第攻破並將岐山寨燈盞窩要隘暨賊屯糧之施村破獲黃三通踞平天寨雖號堅巢而險要盡失援濟亦斷勢成絕地諒不難剋日聚殲著卽督飭劉坤一與王承澤易元泰等各軍乘此機勢擣穴擒渠迅奏全功斷不准任該逆首復行逃竄致畱餘孽其張三一股膽敢圍撲鎮安府城與陸四大互相勾結雖經該處兵

練疊次防剿尙能保全邊圉地方而首逆未殲全股亦未卽殄滅仍著張凱嵩督飭知府興福等激勵軍民務將各股匪迅圖掃蕩毋任蔓延鎮安一帶距省寫遠爲兵力所不及見當潯梧軍務得手之際鎮安道路亦漸疏通諒各土匪亦必聞風知懼卽各兵團亦益加鼓舞該撫務當因勢利導速將邊境力籌保衛毋以荒僻視爲緩圖任令匪徒肆其蹂踐一俟潯郡軍務肅清各軍有可分撥卽當酌量籌撥援濟以慰邊氓望治之心左江泗太各屬見在有無股匪尙行肆擾並著張凱嵩詳查具奏梧藤等處各匪曾否淨盡前經諭令毛鴻賓等飭令方耀一軍會西省官軍剿除兩粵毗境餘氛並著張凱嵩仍遵前旨飭令蔣澤春等與東省之軍隨時聯絡於各路餘匪竄匿之處併力掃蕩柳州獐匪梁扶英剿平之後地方是否安謐本日張凱嵩奏片內稱赫勇管帶旣不得人

其代辦提督蕭榮芳請假回籍此時當可假滿柳州爲粵西重鎮該員代辦提督印務甚得軍民之心著該撫卽催令迅速仍同代篆以資得力將此由五百里諭令知之○己未諭議政王軍機大臣等前因僧格林沁奏勦辦白蓮池教匪及東昌一帶土匪逆產請逐一查辦並招集難民懇種降旨特派已革直隸總督文煜等專司辦理嗣據閻敬銘奏曹單等處強悍貧民未便移諸兗州荒亂之地其黃河北災民均因安土重遷不願分投遷徙當照所議停止移民認墾茲據僧格林沁奏接准文煜報稱查出東昌曹州臨清兗州等屬逆產二百五十七頃餘畝絕產荒地三百三十四頃餘畝各處難民既不願前往認墾目未便強令遷移請將此項田地入官招佃耕種按畝交租不得照民地僅納錢糧以昭覈實而裕經費等語所奏甚屬妥善著閻敬銘督飭地方官認真辦

理毋得稍有弊混並著戶部查照定例此項入官地畝每畝應交租項若干迅速移咨該撫遵辦其查出房間或招租或變價均著閩敬銘斟酌妥辦閩敬銘擬將鄒縣逆產作爲白蓮池添設文武衙署書差兵役飯食之用雖係因公起見究恐不免牽混所有白蓮池應設文武官署等項經費著該撫另行籌款撥給其流亡未歸荒田卽照該撫前議予限一年如限滿不歸一併入官招墾輸納官租惟滕縣絕產二頃八十八畝零若一概入官該絕戶不免餒而之恨除零星地畝毋庸計議外如查有絕戶地畝在數十畝以上者自應傳集該戶家族人等如有情願過繼子嗣爲其立後者卽以該戶田地畀之用示朝廷繼絕存亡之意並著閩敬銘妥籌辦理僧格林沁片著鈔給閱看將此諭令知之○僧格林沁國瑞奏皖北一帶經臣等派隊清查各處已無窩藏巨匪地方漸就

肅清惟豫西張總愚一股尙在李青店以該處山叢路狹馬隊官軍難於深入已遵旨札飭蘇克金擇要扼紮見據蘇克金稟稱已派營總壽春等帶兵勇駐紮南召該翼長仍駐魯山確探賊蹤如該匪出竄卽行會合兜剿等情自應仍俟步隊誘賊出險馬隊方可鈔擊等擬俟喬松年到皖將善後安撫一切事宜妥爲商辦後卽分撥馬步前往會剿上諭僧格林沁等奏擬撥兵赴豫會剿並查辦蒙城等處荒田安撫窮黎及遵查苗逆仇殺徐立壯等案情一摺另片奏請將東省查出逆產田地一併入官交租等語苗逆仇殺徐立壯等一案已將總兵黃鳴鐸及壽州紳士公稟等件交兵部立傳翁同書閱看據實登覆俟兵部查覆後再降諭旨其山東白蓮池等處查出逆產亦照該大臣所請諭令闕敬銘督飭地方官將此項田地歸官招佃照納官租以杜弊混而裕經費

其蒙城等處荒山卽著該大臣嚴飭各州縣確切查明認真妥辦務令流民復業田地不至荒蕪豫西股匪尙在李青店盤踞不可不迅圖撲滅該大臣見雖未能卽赴豫省惟當嚴飭蘇克金等馬隊會同豫省各營將張總愚一股悉數殲除俾不至日久蔓延爲患將此由五百里諭令知之○諭前因僧格林沁覆陳籌辦李世忠情形當經寄諭曾國藩迅將李世忠調至軍營勦賊並遵旨妥辦一切茲據僧格林沁奏派赴五河一帶探聽李世忠動靜之總兵王佐臣等同營面稟據李世忠聲稱所管勇隊除有家業者業已遣散外其餘見已請示曾國藩辦理礮位船隻亦已分別遣畱所管各州縣及釐卡地方擬卽稟請曾國藩派員接管情詞極其馴順惟所言與所行是否相符尙難遽信必須俟李世忠遵調前赴曾國藩軍營並將淮北各城及釐卡地方全行交出由喬松年

派員接管方見其言行符合並須俟曾國藩喬松年將各事辦妥該大臣方可督軍赴豫剿匪各等語僧格林沁老成之見慮事甚屬周詳著曾國藩迅速遵照前旨札調李世忠到營將其部眾妥爲布置所占城池釐卡諭令交出歸官一俟辦理妥協卽行知照僧格林沁俾得拔隊赴豫毋稍稽遲致生他變僧格林沁原摺著鈔給閱看喬松年見在督辦江北糧臺須俟接替有人方能赴任著曾國藩迅飭萬啟琛速赴江甯藩司之任以便喬松年交卸啟程喬松年到皖後著曾國藩將此次諭旨及僧格林沁摺均另錄一分密行知照會同商辦○諭毛鴻賓奏官軍攻剿三山土匪賊巢及見在籌辦情形一摺陽山縣匪首鄧二尺七糾黨肆擾恃險負隅歷有年所此次四出劫掠經張運蘭督兵進剿破其隘卡三重擒斬多名該逆遁回三山老巢剿辦甚爲得手惟該逆巢山深

林密嘯聚易滋若不乘此聲威悉數殲滅將來兵勇一撤必將餘
燼復然毛鴻賓見飭張運蘭將所部五隊全數調齊併力進攻所
辦尙合機宜卽著督飭該臬司帶領全部兵勇鼓勇前進務將鄧
二尺七擒獲並餘黨及三峽頭另股逆匪馮九指等一律掃除免
致養癰貽患將此由五百里諭令知之○諭勞崇光張亮基奏擊
退偏省賊匪省城解嚴李逆餘黨竄擾黎平請飭催楚軍帶餉會
剿各摺片修文雖已收復餘匪尙踞開州勞崇光張亮基務當督
飭派出各軍奮力攻克勿任逆匪再竄他處松桃所屬衛汛經黔
楚各軍收復並攻克觀音堂賊巢廳境一律肅清惟首逆包茅仙
先期率夥黨數十人逃竄至馬鞍山等處糾黨圖逞雖經節節擊
敗擒斬黨與多名而包逆仍在漏網著責令該文武員弁設法兜
拏勿任免脫免致餘燼復然代理廣西西隆州知州陳錫藩越境

攻克冊亨城池餘匪竄向貞豐州城陳錫藩復移師進剿興義逆
回轉戰數月擒斬甚多並設法離間招撫實屬急公可嘉著勞崇
光等飭令該員認真辦理仍飭興義府縣實力會剿以收廓清之
效貞豐州城能否派兵攻克並著酌度調派李幅猷分股竄擾靖
州所屬播揚等處意圖窺伺郡城副將成應洪等均以眾寡不敵
遇害著憚世臨飛檄總兵周洪印督率勁旅兼備楚餉馳赴黎平
會黔軍防剿勞崇光張亮基仍卽懷遵前旨派得力兵勇馳赴黎
平一帶痛加剿洗楚省官軍固應不分畛域黔省大吏又豈可專
恃客兵務須同心合力將此股髮逆及苗教各匪次第殲除庶黎
郡肅清邊圉無恐已革副將周洪順當逆匪攻撲各營之時該革
員並不督練助剿反敢攜帶行裝潛行回省搖惑軍心幾誤大局
該督撫將其正法自是正辦貴州軍務未竣該督撫等必當振刷

精神力圖掃蕩以副委任另片奏陸傳應居官植品所至有聲見飭赴楚聽候查辦如案內尙無徇隱情弊可否俟奏結後併案獎敘等語陸傳應以監司大員朝廷豈不知其才具惟以湖南釐捐局內有撤任查辦之案是以該督撫前此奏保曾經降旨令俟結案後再行酌量辦理前諭甚明何得嘵嘵屢瀆意存見好著卽飭令該員速赴湖南聽候訊辦如訊無扶同徇隱情弊仍著憚世臨於定案時聲明請旨將此由六百里各諭令知之○諭各省督撫等嚴定假冒翎頂員弁罪名○予貴州殉難道員戴鹿芝等祭葬世職建祠陣亡副將何顯仕等祭葬世職○予湖南陣亡總兵官成應洪學正姜吉瑞等祭葬世職○庚申諭議政王軍機大臣等熙齡奏甯夏逆回勾結情形一摺逆回馬化澂黨與攻陷橫城興武兩處營汛地方卽在該處設立集市與蒙古兵民交易囤積糧

食並傳聞有與蒙民勾串夥同搶劫得贓俵分之事又馬化澂由綏遠城約去回匪二百餘人假冒官兵冀免沿途盤詰及至興武營地方則肆行搶劫隨後尚有千餘人陸續前往等情雖據熙麟奏稱所得傳聞均係偵探兵役口述之詞而同情詭譎異常該逆自陷甯靈之後又復攻陷橫城興武兩處營汛前此尚未據奏聞見在該處回氛正熾其四出勾結及聲東擊西所至藉端希圖搆釁均在意計之中綏遠歸化兩城與甯夏毗連蒙地尤應嚴密防範前經諭令德勒克多爾濟等整飭兵勇爲訥欽後路援應副都統桂成係久經行陣之員著卽將防剿事宜會同該副都統等妥辦並將綏遠城等處安分良回妥爲撫綏務令各安生業毋爲甯夏逆匪恫疑搖惑自取殃禍其有由甯夏前來該城煽約良回之賊匪奸細並本地或有不安本分勾通外匪爲害地方之匪徒人

等均卽設法嚴密查拏懲辦以杜奸謀而安反側其馬化澂由綏遠約去回匪二百餘人隨後尙有千餘人陸續前去等情究竟有無其事並著德勒克多爾濟等不動聲色嚴密訪查督飭地方妥爲防範毋稍大意訥欽見在帶兵由朔平綏歸一帶前進亦應隨時戒備沿途偵察情形嚴飭兵弁整隊前行或行至包頭鎮一帶暫行紮駐探聽毋致爲奸匪所乘是爲至要該署提督所帶直隸省官兵二千名尙恐不敷進剿卽著劉長佑於直隸各標營再行調撥官兵一千名沈桂芬於山西各營調撥官兵一千名均卽剋日派向朔平綏遠城一帶進發以爲訥欽後路之軍此項官兵並著劉長佑沈桂芬挑選精銳派令得力將領管帶迅速啟行仍將所需軍火糧餉寬爲籌備給發毋稍稽滯行抵歸綏一帶卽與訥欽所帶官兵會合均歸訥欽節制調遣其統帶之員由訥欽酌定

或卽於直晉兩省原帶各員內選派或於各路軍營知有得力之員奏調均由訥欽自行辦理如由京中察看遇有可派之人亦卽續行派往以資臂助晉省沿邊各境此時均應設防而陝省軍務仍尙未竣河濱布置未可稍疏此次飭令沈桂芬於各營調撥官兵千名以爲訥欽後路卽著閻敬銘於山東省各勇營內調撥勇丁千名選員管帶剋日飭赴山西省以爲填紮之用東省勇丁多由南省募來其到晉後派令於南路茅津渡等處設防應資得力著沈桂芬妥爲調度訥欽所統之兵前後共四千名係專赴甯夏進剿究由何路進取前已有旨令劉長佑與訥欽妥商卽日前進如果由朔平等處進發不由口外行走則歸綏一帶之防德勒克多爾濟等卽當專力籌備是否足資堵禦訥欽所統官兵能否分撥一千仍赴歸綏協同防剿並著德勒克多爾濟及訥欽與沈桂

芬及時豫爲籌定奏聞至定邊之防係恐賊由內地竄入陝境而設前由東省調赴楚勇千名此時計可到防是否單薄如須添兵卽著多隆阿酌量調派並著熙麟於楚勇到防後就近隨時聯絡調度以資防剿將此由六百里各諭令知之○諭寄諭阿拉善親王貢桑珠爾默特本日據熙麟奏甯夏回匪勾結情形一摺據稱甯靈逆首馬化澂黨與攻陷橫城興武兩營汛在該處設立集市與蒙古兵民交易囤積糧食並有勾串夥搶分贓情事等語該王旗所屬蒙民久與內地相安斷不至滋生事端惟沿邊一帶蒙古所屬佃戶居多貪利是其本性卽該王旗部下蒙古人等素來安分而貪利爲匪者恐亦不免雜出其中尤恐所屬地方遼闊該王未及周知見經熙麟行文該王旗禁止著貢桑珠爾默特迅卽督飭所屬密行訪查如有蒙民貪圖小利與該回匪交易及勾串搶

劫者立即嚴拏懲辦毋稍疏縱從前陝西回匪初起時該王旗即將境內居住回眾盡行驅逐出境見在甘省回眾潛與該王旗境內蒙民勾串將來聚集日多難保不向該蒙古地面滋事以圖報復且該王旗所部蒙兵前次赴援慶陽時路經甯夏爲回匪邀截被害者甚多此時豈可再令回匪與所部蒙民勾串滋事該王務當振刷精神力行禁止以期保全本境儻漫不經心任聽奸回蔓延日廣惟該王旗是問諒貢桑珠爾默特當知以防務爲急不至漫無備禦致令回匪滋蔓難圖也將此由六百里諭令知之○諭略秉章奏勦辦滇邊逆匪獲勝並掃蕩碉寨伏賊川界肅清一摺逆匪何金龍在滇邊糾合游匪數千人於上年十一月十五等日竄至川界筠高境內經提督胡中和分飭各營並約會總兵李復勝等軍馳抵川滇毗界之斑竹塘分投進剿俘斬甚多惟何逆尙

未就殲見在逃往何處著駱秉章迅飭各營及地方文武嚴密搜捕務將該逆首就地殲除以期淨絕根株毋畱遺孽至金子口四方祠等寨均有賊匪潛伏與何逆勾通亦經胡中和等督飭各營分道進攻斬馘不少何逆弟姪等亦均拏獲正法伏賊一律剿滅淨盡川境肅清勦辦尙爲奮勉惟滇邊散練游匪伏莽尙多並著駱秉章咨會胡中和分飭各營嚴防要隘毋任匪蹤闖入其由黔省正安竄入川境之號匪卽著駱秉章飛飭李復勝所部果後三營迅由興文迎頭截擊毋令蔓延腹地以靖疆圉將此由六百里諭令知之○辛酉飭撥山西河東鹽課銀十萬兩備陝西軍餉○甲子曾國藩奏金陵城中積糧未罄仍爲負隅死守之謀另股分擾上興埠力山柘塘等處十二月二十八日夜窺犯溧水該城守將王可陞登陴防禦賊不得逞侍逆勾結堵逆黃汶金及廣德餘

黨於正月初二日由甯國縣上竄初六日已至績溪人數頗多意在衝過徽州直上江西沈葆楨探得賊勢趨重東路已調韓進春五千餘人移防玉山席寶田等軍萬人移防婺源臣亦調毛有銘一軍由安慶過江馳赴休甯均爲江皖交界遊擊之師以期合力堵剿上諭議政王軍機大臣等東南軍務正在得手金陵賊巢雖未卽破而檻穽之勢已成此時自以防賊出竄滋擾他處不令餘燼復熾致成不了之局爲最要著節據曾國藩左宗棠所奏均有賊欲竄由皖南以犯江西之語茲據曾國藩所奏侍堵兩逆果已擁眾突竄績溪深恐左宗棠所派駐防徽州屯溪鎮之王開琳官軍不敷扼截被賊衝過著卽飭令所調毛有銘軍星馳前赴休甯與王開琳一軍相爲聯絡策應毋令賊得肆其奔竄沈葆楨所調韓進春五千餘人移防玉山席寶田等軍萬人移防婺源均能

豫籌守禦並著督令兩軍實力嚴防務令賊黨不得闌入江境此次賊之分股出竄僅係侍堵兩逆而忠逆不在其中是否仍與洪逆死守金陵抑仍在句溧等處堅踞馮子材等鎮江之軍與賊相持因鮑超一軍未能往會未卽進攻鮑超刻下是否尙在東壩南岸各軍防剿正當喫緊之際殊恐不敷分撥因思北岸揚防無事官軍屯戍已久都興阿老於兵間頗形持重是否可以量爲調撥令該將軍帶赴南岸與馮子材等合力以攻丹句之賊使常州賊黨失其援應則李鴻章所部攻取毗陵自可迅期得手卽分竄皖境之賊亦將有後顧之虞不得直前衝突都興阿坐守揚州未免髀肉復生之歎如其帶兵過江足資臂助卽著曾國藩迅速奏明飭調其淮陽一帶卽可交吳棠妥爲籌防富明阿因傷疾舉發請假見在清江調理就痊亦可回揚營以資統率鮑超軍在東壩能

否量爲調撥廣德勦撫究竟如何如由此路能有一軍以躡賊後
亦可與毛有銘王開琳等軍前後夾擊均著曾國藩酌量妥籌賊
勢已偪徽防浙師應由嚴州出兵邀擊左宗棠所部能否相機酌
撥著卽與曾國藩隨時聯絡策應以保萬全將此由六百里各諭
令知之○乙丑諭內閣朕奉 慈安皇太后 慈禧皇太后懿旨
三載考績爲國家激揚大典中外滿漢諸臣有能認真辦事克著
勩勤者允宜特加甄敘其或衰庸不職亦必立予罷斥當茲多事
未已朝野望治孔殷尤應黜陟幽明用彰旌別茲屆京察之期吏
部開單題請自當詳審以爲舉錯議政恭親王賢親最著輔翼公
忠自首贊樞廷於今三載於用人行政一切克盡勩勤勞罔懈
著交宗人府從優議敘工部尙書文祥戶部尙書寶鋆工部尙書
李棠階兵部左侍郎曹毓瑛同心協贊克愼克勤均著交部議敘

大學士湖廣總督官文敷歷封疆宣勤最久於軍謀吏治眾善靡遺協辦大學士兩江總督曾國藩督軍勦賊節制東南數省盡心區畫地方以次削平舉賢任能克資羣力四川總督駱秉章連年辦賊疊平巨股全蜀漸就肅清於鄰省軍務及地方整頓各事宜均能實力妥籌精勤罔懈閩浙總督兼署浙江巡撫左宗棠自簡任封圻以來辦理軍務及地方事宜均能果敢嚴毅克復浙東郡縣卓著戰功江蘇巡撫李鴻章親履行間克復蘇州省城及各郡縣功績殊彰均著交部從優議敘吏部左侍郎孫葆元才具平庸內閣學士中常年力就衰均著原品休致餘著照舊供職○丙寅諭議政王軍機大臣等前因僧格林沁奏遵查苗逆仇殺徐立壯等案並呈遞黃鳴鐸及壽州紳耆稟詞當經諭令兵部傳知翁同書據實聲覆茲據翁同書逐條呈覆所稱孫家泰蒙時中被害情

形與黃鳴鐸等稟大略相同惟於徐立壯則稱其句結長髮擒匪
圖襲壽城在城內恣意淫掠殺害無辜兵民共憤經黃鳴鐸等拏
解前來數其罪而誅之士民同聲稱快袁甲三從前奏報亦有徐
立壯句來擒匪又爲苗沛霖句結擬爲內應之語而黃鳴鐸與紳
耆公稟則於招擒重情全未提及著曾國藩喬松年將徐立壯句
擒焚劫各情細加訪詢是否確有其事據實查明具奏至博崇武
等三鎮突圍南去其爲畏懼苗逆已屬顯然曾否與逆合隊攻城
當時眾目共睹無難查辦張學醇爲苗說和往來苗營肆行無忌
曾否爲苗設計並曾否帶隊赴壽偏死孫家泰等鄒學鏞等附苗
情形並當日禦苗死事各員弁應行查卹者均著該督撫詳查速
奏毋稍徇隱翁同書呈一件黃鳴鐸等稟二件孫家泰等履歷一
件均著鈔給曾國藩喬松年閱看昨有旨令曾國藩察度情形調

都興阿兵渡江剿賊見在陝甘軍情緊急山西綏遠城逼近回氛
防務頗形喫重本日已令都興阿前赴綏遠會同德勒克多爾濟
辦理防務並令富明阿卽日前赴揚州接統都興阿所部扼守江
北目下揚防無警江北兵勇尙屬不少應如何調遣過江助剿以
益馮子材等兵力著曾國藩妥爲區畫一面奏聞一面調派以資
得力前據步軍統領衙門拏獲苗逆奸細岡瀾川等五名業經刑
部訊明於本日正法其同行落後之夥犯開鐵三包明典並供出
白旗賊目張汶得已諭令山東河南巡撫嚴拏該犯等從苗爲逆
皖北是其熟徑難保不潛行逃回並著僧格林沁喬松年督飭地
方員弁嚴密查拏無任免脫將此由六百里各諭令知之○諭訥
欽奏督兵馳抵歸化城取道朔平前進請添調官兵馬隊一摺前
因訥欽所帶兵止二千恐不敷進剿諭令劉長佑沈桂芬各調兵

一千名馳赴朔平一帶歸訥欽節制調遣昨據劉長佑奏遵調官兵一千由正定固關入晉沈桂芬於接奉寄諭後諒亦挑選精銳星速啟行訥欽見由歸化城向朔平府進發著卽催提直省運解之槍械帳棚等件趕緊解到一俟部署已定卽由榆林府渡河前赴甘境相機進剿所有續調直隸山西官兵二千名均由訥欽酌量調派以厚兵力該提督當懷遵疊次諭旨力圖掃蕩援救甯夏等城毋稍耽延致負委任訥欽一軍所需月餉若待直隸解往深恐緩不濟急著沈桂芬就近籌撥派員隨赴行營支放其直隸應解餉項卽運交山西兌抵訥欽行營應需一切軍火器械並著劉長佑沈桂芬隨時運解接濟以利軍行德勒克多爾濟所調之旗綠及兩盟蒙古官兵分紮薩拉齊及磴口等處均毋庸遷調仍分飭該營將領駐紮防範並將存城官兵隨時訓練爲訥欽後路援

應毋稍疏虞正在寄諭間據多隆阿奏報近日軍情及勦辦髮逆獲勝一摺甘肅徽縣兩當髮逆有出寶鷄山口由郿縣分援盤屋之說該大臣檄調陶茂林一軍由汧陽折回鳳翔進剿在兩門鎮二嶺關等處擒斬甚夥惟該匪見竄草涼驛通衢要路隨在可以分竄著卽督飭陶茂林認真截勦毋任回竄漢中致滋蔓延鳳翔回匪自就撫後猖獗如故朝廷早有所聞著多隆阿加意偵察如竟不妥卽嚴飭陶茂林痛加勦洗不准少爲遷就貽患將來慶瑞辦事何如是否可靠並著該大臣畱心察看盤屋一城何以久未攻克該城一日不拔則該大臣各軍不免爲所牽掣著卽激勵將士奮力進攻迅拔堅城毋再延誤一俟盤屋攻拔該大臣卽統率大軍馳赴漢南勦辦逆氛廓清全陝春色已深秦中應已晴霽並著速飭曹克忠將麟遊一帶之賊剋日掃除訥欽請飭多隆阿調

撥馬隊五百名能否分撥著酌度辦理多隆阿另片奏各路分兵糧草若仍自行經理恐鞭長莫及等語著張集馨選派妥員分路籌辦各營糧草毋令缺乏甘省援兵漸集糧臺最關緊要本日特派副都統文煜前往督辦熙麟當就見有兵力與訥欽所部聯絡策應以期速殲回氛肅清邊圉將此由六百里諭知多隆阿德勒克多爾濟劉長佑熙麟沈桂芬訥欽並傳諭張集馨知之○諭前因甘省靈州及甯夏漢城失守回氛甚熾該處與綏遠歸化兩城地勢毗連節經先後調撥直隸山東等省官兵四千名由署直隸提督訥欽統帶前往援剿並諭令德勒克多爾濟等實力守禦本日據訥欽奏到見已馳抵歸化擬由朔平一帶分起取道前進矣歸綏一帶防務緊要必須有知兵之員整飭兵勇慎重籌防方可
以資重鎮而免疏虞都興阿久在行間辦理軍務素稱得力著卽

星速馳赴綏遠歸化兩城會同德勒克多爾濟等將該處一帶在
防兵勇訓練操防嚴密堵遏回氛毋令賊蹤竄入兼爲訥欽後路
接應方爲妥善富明阿傷病諒已就痊著卽迅回揚營督率都興
阿所部兵勇妥爲布置調遣如應須派撥南岸助剿者卽著酌量
派撥其不能打仗之兵勇並可會商曾國藩酌量裁撤以節糜費
見在丹旬一帶尙爲賊踞馮子材鎮江之軍與賊相持因兵力較
單未能前進富明阿到防後酌量情形如傷病尙未全愈不能親
自渡江該將軍卽可在揚防坐鎮一面選派得力兵弁迅赴南岸
相機助剿與馮子材之軍聯絡一氣痛埽賊氛不得意存畛域致
誤事機將此由六百里各諭令知之○命副都統文煜赴甘肅慶
陽督辦糧臺事務○轉毛昶熙爲吏部左侍郎調吳存義爲吏部
右侍郎以王發桂爲禮部右侍郎

由左副都
御史遷

○丁卯諭議政王軍

機大臣等劉蓉奏官軍進紮甯羌探聞漢郡各賊修葺城垣爲負隅抗拒之計中旗與曹逆竄踞略陽之郭家壩等處窺伺漢南後路見會商周達武併力夾擊請令多隆阿派撥曹克忠一軍前赴畱壩會剿並請飭李雲麟於商州解圍後仍卽折回茶鎮等語中旗髮逆與曹逆圍攻秦州未得逞志復竄略陽之郭家壩等處若官兵進趨漢南恐該逆伺我後路諸多牽制著劉蓉迅卽會商周達武派兵併力夾擊先將此股剿滅則昭廣一帶防兵均可撤赴漢南以益兵力見在各防布置已定營務整頓纔完該撫當激勵諸軍剋日前進馳赴陝南實力勦辦務將被陷各城一一克復若再遲延恐該逆盤踞日久根柢愈深彌難著手該撫其振刷精神勉圖報稱以副委任曹克忠見在進攻麟遊一帶能否調赴畱壩之處著多隆阿察度情形酌量辦理無任該匪北竄致滋延蔓李

雲麟前奏進擣西鄉並派兵畱守興安新舊兩城與劉蓉晤商會
剿並未折回商州著劉蓉於馳入陝境後飛速知照該京卿會師
合剿分路堵截以期迅殄逆氛廓清全境將此由六百里各諭令
知之○以汪元方爲左副都御史

由通政使遷

○戊辰予安徽陣亡副

將陳開用等祭韓世職○己巳左宗棠奏十二月二十五日楊昌
濬等督各營分路進攻餘杭踞逆康國器於黎明乘賊未覺越濠
而進連破東路賊壘四座並將楊家橋賊卡焚毀北路官軍乘勢
急進鳧水過河揮兵猛擊立破何家陡門堅壘五座是日東北兩
路殺賊二千有餘陣斬闖天義李有馨等賊目多名其黃少春一
軍進攻平窯鎮賊壘鏖戰數時因逆賊負山修砌石壘死守不出
官軍仰攻輒爲礮石所傷僅破賊卡五處二十六日各軍分路而
進越餘杭縣城而北直擣林清堰首逆汪海洋老巢該逆率悍黨

數千憑壘拒戰官軍奮力衝突擊斃六七百名追過小港已偏汪
海洋老巢楊昌濬以收隊之路長亘五六里雙港夾之勢難列陣
傳令收隊甫過橫港壘中悍賊悉銳來撲並分伏港邊竹林排開
槍礮以致余佩玉中礮陣亡各營弁勇之殿後力戰陣亡者共三
百餘名二十七日杭州城外古塘踞逆率眾撲犯錢塘門外官軍
營壘經高連陞等擊退斃賊百餘名二十八日楊昌濬黃少春復
列隊五聖廟遣輕騎誘戰賊仍伏匿不出查汪逆所踞之林清堰
在城北十里溪流環匯進攻之路能魚貫而不能鴈行官軍收隊
爲賊所乘實由臣未能詳察地勢趨戰過急之故非將士戰陣之
不力也見仍激勵各軍設法攻勦務期迅速蕝事以利戎機此次
血戰捐軀之副將余佩玉等應請旨飭部從優議卹並入祀湖南
昭忠祠以慰忠魂又奏海甯州城濱臨大海雄踞下游爲杭垣東

北屏蔽僞會王蔡元滙擁眾萬餘竄踞其閒致攻杭之師未能北渡合圍浙東之防亦時形喫重嗣因杭州餘杭等處疊獲大捷蔣益澧一軍進薄鳳山清波湧金錢塘等門賊勢日蹙蔡元滙遁通款於前署海甯營都司王錫馴轉稟蔣益澧願率所部獻城乞降蔣益澧來營密商臣以蔡元滙於大軍未至之先望風款附其情與勢蹙乞降者不同當令其妥籌招撫蔣益澧飭署杭州府知府陳思燭署海甯州知州廖安之先往覘之而自率親兵及副將劉樹元所部並水師各營於上年十二月十六日馳赴海甯州對江之小泗波駐紮一而令王錫馴廖安之等入城曉以禍福蔡元滙隨同廖安之等渡江來見泣訴衷曲蔣益澧察其情詞懇切卽宣布朝廷恩德爲之更名元吉飭令回城將被脅夥黨一律薙髮呈繳礮械等件二十七日官軍入城蔣益澧挑其精壯列爲八營交

蔡元吉管帶駐紮城外聽候調遣責令立功贖罪餘均資遣回籍
蔡元吉捐給所部入營兩月丁僅復捐給散遣之資眾心亦服見
在城內有劉樹元等營分布防丁城外有張景渠等各營駐紮足
資控制臣維海甯一城既下杭州賊勢更孤從此東北兩面可期
逐漸合圍於大局實有裨益蔡元吉雖久陷城中而自拔來歸不
煩兵力應請旨賞給四品翎頂以昭激勸辦撫出力之已革前署
甯紹台道張景渠請免其治罪留營差遣以觀後效前署海甯營
都司王錫馴首先入城尙知愧奮請免其查辦仍以都司留浙補
用並免繳捐資其餘出力員弁可否由臣查明俟克復杭城彙案
保獎又奏用兵之道勦撫兼施而實則撫之流弊極多臣入浙以
來祇行解散一策不敢輕議招撫見在杭州城內及石門德清各
逆酋均有求撫之事海甯撫局一成各逆私相猜貳者更復不少

頃准李鴻章密咨亦稱僞聽王陳炳汶呈遞帛書乞降臣以各賊
倡聚一方勢實窘蹙其求降固在意中然事前之詐僞宜防事後
之安插不易此中節目甚多惟有分別勦撫相機辦理上諭議
政王軍機大臣等降人蔡元吉雖所保稍優惟獻城反正功尙可
錄自與他處僅係脫身來歸者不同該督摺內所稱蔣益澧將其
精銳挑選入營卽交蔡元吉管帶人數已屬不少著左宗棠將該
降人畱心察看妥爲防範如有未盡馴伏恐滋事端之處仍須隨
時量爲遣散並卽傳知蔡元吉此次優給頂翎乃朝廷逾格恩施
俾益感奮該督奏片所陳招撫一事流弊甚多事前之詐僞宜防
事後之安插不易惟有分別勦撫相機辦理持論頗爲通達此時
海甯撫局已成各逆私相攜貳其應如何乘機分別勦撫之處惟
在該督妥爲籌辦僞聽逆陳炳汶早有與洪逆及李秀城互相猜

疑之說此時在李鴻章處呈遞帛書乞降卽著左宗棠與李鴻章
妥商辦理餘杭進攻兩勝一挫康國器楊昌濬等各軍攻破楊家
橋等賊壘聲勢甚壯惟瓶窯鎮賊壘未能盡破至進攻林清堰賊
巢因地勢未詳趣戰過急致爲悍賊汪海洋所乘傷亡將士殊爲
可惜見在海甯收復杭州賊勢更孤東北兩面可漸合圍且偏攻
餘杭諸軍不須再籌分兵他顧更可一意併力攻取著左宗棠卽
嚴督諸軍奮力攻擣迅拔名城以奏膚功據曾國藩奏侍堵兩逆
已由甯國竄至績溪此次左宗棠奏報於賊竄績溪等情未經陳
及殊深廬繫著仍遵前旨相機調撥出兵遊擊與曾國藩隨時聯
絡防剿毋令賊得肆其衝突復擾他處蔓延爲患杭州府知府一
缺向係揀員調補惟此時爲地擇人卽著該督酌籌應行請補請
調不必拘定資格總以得人爲要俟奏到時再降諭旨將此由六

百里諭令知之○諭曾元福丁曰健奏生擒首逆勦滅巨股會匪
並林文察奏圍攻林洪各逆老巢疊獲勝仗各一摺逆首戴萬生
於官軍攻破斗六後逃至張厝莊經曾元福帶兵將該莊附近西
南一帶之目宜山紅毛社丙郎莊社頭崙仔等處逆莊四十餘處
分路剿毀復與丁曰健所派勇丁合破張厝莊該逆遁至芋寮仔
莊復經曾元福丁曰健親督兵勇將該莊攻破生擒首逆戴萬生
並逆犯董九仙戴印等正法彰化縣屬西南大路俱已肅清辦理
尙屬得手此股會匪黨與眾多尙須力行搜捕尤防其竄入內山
番地復行嘯聚曾元福丁曰健務當分派兵勇嚴扼入山要隘以
杜餘匪竄山之路一面搜捕淨盡以絕根株毋貽後患曾元福見
督兵進攻小埔心陳啞狗巢穴諒可迅速攻拔該署提督擬俟事
竣後內渡著左宗棠徐宗幹屆時酌量情形將曾元福及其所部

兵勇撤歸內地以節餉需至內山北投四塊厝爲林晟洪機等逆
另股盤踞卽責成林文察等速行攻克將首逆林晟等擒斬毋任
漏網仍著丁曰健分派勇丁扼要堵禦毋令該逆紛竄臺灣各路
漸次肅清林文察見稱擬畱兵勇五千名足資防剿此外兵勇及
曾元福所部已咨請左宗棠徐宗幹分別撤回著卽照所擬辦理
將此由六百里諭知左宗棠徐宗幹並傳諭林文察曾元福丁曰
健知之○諭張之萬奏官軍攻克談圍連破賊寨並進剿李青店
賊匪獲勝各摺片汝南官軍克談圍後乘勝將王占魁等寨踏平
計殲逆首王立柱見在進攻王廷幹老巢該逆附近各寨業已次
第掃蕩王廷幹勢成孤立官軍趁此聲威併力進攻自不難迅殄
妖氛著張之萬毛昶熙激勵將弁實力進剿務將王廷幹老寨趕
緊攻拔以期肅清汝境毋令頓兵日久致該逆死灰復燃又肆蔓

延張總愚一股避兵喙伏負嵎不出見在吳再升進紮李青店西北之馬市坪葛承霖進紮正北之回龍溝張曜軍於西南之板山坪李青店三面均已嚴備該逆因官軍日逼日近漸次南趨正當乘此賊勢窮蹙之時節節進紮以期偏賊出險蓄張之萬督飭派出各軍分路勦洗掃除窮寇該匪乘虛南走蘇克金馬隊遠在魯山深恐鞭長莫及致令該逆得以乘間兔脫見在蘇克金已分隊馳往南召著張之萬督令統率所部駐紮南召左近嚴密堵禦一俟該逆出險卽當痛加懲創並嚴飭張曜葛承霖吳再升等分投截勦痛殲醜類張之萬另片奏該逆因畏馬隊不敢南竄趨重北路馬市坪防兵尙嫌單薄該處山路崎嶇馬隊又未能深入等語張總愚避兵鋌走本屬意中之事著該撫督飭派出之副將尹嘉賓等軍均赴馬市坪會同吳再升兵勇扼守要隘豫爲嚴備不可

稍涉大意將此由六百里各諭令知之○于浙江陣亡副將余佩玉等祭葬世職入祀昭忠祠○庚午李鴻章奏常州踞逆堅伏不出惟於西門外通丹陽宜興大路添築營壘數十座我軍偏紮東南北三門緣常城過大兵數稍單未能遽圖合圍而賊勢漸衰亟須設法攻擊十二月二十五二十九等日戈登來謁願由無錫進勦宜興兼助官軍攻常之勢正月十二日帶隊由崑啟行請臣派

提督郭松林並淮揚水師數營與之同進

臣

當飭李鶴章調派郭

松林等所部各營及王東華等所部水師與常勝軍會合進勦並飭劉銘傳等於常勝軍進攻宜興時分督各營猛攻常城使賊首尾不能照應或可先後得手浙西自嘉善復後劉秉璋程學啟各督所部進逼嘉興十二月二十一日偽榮王廖發受分股由東南兩門出撲劉秉璋潘鼎新派隊迎擊大破之擒斬溺斃無算追近

城下榮逆乃於二十九日遞稟乞降臣飭程學啟劉秉璋等移營

進逼察看妥辦程學啟等屢帶小隊赴城偵看賊中布守甚嚴恐

其別有狡謀臣惟飭各軍穩慎會攻迅規嘉郡以固蘇滬門戶至

李秀城李侍賢二酋將來窮無復之必由句容溧陽廣德一路竄

走浙皖交界而入江西臣軍從下游節節仰攻勢不能繞越賊區

扼斷竄路以臣見處境地並見有兵力計之欲保蘇滬不得不分

攻常嘉以勦爲堵其圖常州也將以聯絡鎮江之氣外堵其北竄

長江內堵其繞竄腹地其圖嘉興也將以制杭賊之勢外堵其竄

越海塘內堵其回竄松滬至由金陵溧陽竄皖浙之路臣力萬不

能及想在聖明洞鑒之中昨因戈登欣然效順令其協同郭松

林等進擣宜興但可以爲奇兵而不可以爲正兵如果常州宜興

次第攻克或分擣溧陽旁略丹句遲速利鈍殊難逆料而兵勢自

北而南路徑叢歧亦難保賊眾不由南路竄走若常宜得手後賊以全力由句溧一帶突竄自當謹遵諭旨分飭將士躡追與東壩西浙各軍前後夾擊昨接曾國藩函商欲調程學啟赴金陵協攻程學啟先已進兵嘉興難遽撤退應俟嘉郡克復守局穩固再飭程學啟移軍西向屆時商酌調派總期於兩面大局皆有裨益上諭議政王軍機大臣等常州城大賊眾官軍未能遽圍合圍而賊勢漸衰自應設法攻擊以期迅剋堅城李鴻章見飭郭松林等軍進擣宜興所辦甚是常勝軍進攻宜興常賊已有首尾不能照應之勢並著督飭李鶴章劉銘傳等分督各營猛攻常城剋日攻拔毋稍遲玩劉秉璋潘鼎新之師屢敗嘉郡之賊進逼城下榮逆廖發受雖遞稟乞降而城中布守甚嚴難保不別有狡謀藉詞緩師李鴻章務當飭令程學啟等乘賊降戰未定之時相機攻勦迅

下嘉城以固蘇滬門戶不得稍涉大意至忠侍各逆圖竄皖浙之路疊經諭令曾國藩左宗棠沈葆楨等嚴扼要隘毋令竄逸李鴻章所稱蘇軍從下游節節仰攻勢不能繞越賊區扼斷竄路等語自係實在情形該撫惟當督率各軍迅復常宜兩城期與金陵諸軍合兵埽蕩方爲妥善程學啟攻勦嘉興正當喫緊且蘇滬守局尙未穩固自難赴調著照該撫所籌俟克嘉郡後酌度情形再行調赴金陵協勦將此由五百里諭令知之○諭李雲麟奏漢中賊黨分南北中三路盡力東趨一由石泉漢陰出興安而至鄖陽一由西鄉出紫陽甄坪平利而至竹山一由甯陝出鎮安而至商州皆於河南之南陽湖北之襄陽一帶會齊該京卿已將興安防守事宜布置隨卽馳赴石泉維時中路股匪欲由茶鎮等處偷渡過江經水師奮勇截回北路之賊已由洋縣渡江擾至甯陝其西鄉

踞逆亦欲由瓦房店梅湖而出紫陽李雲麟已派遊擊金殿安等
進紮紫陽西鄉交界之瓦房店梅湖督團堵截而自率各營親兵
紮石泉迤北之饒峯嶺相機截勦等語髮逆東下勢甚猖獗李雲
麟所部無多恐不能十分得手見在漢南所屬勢必空虚著劉蓉
迅由甯羌一帶進兵先收復漢中郡縣並分兵接應李雲麟以防
疏失該撫當迅速馳入陝境振刷精神力圖滅賊毋稍觀望李雲
麟見紮饒峯嶺地當石泉甯陝之交既可固中路門戶亦可截北
路竄匪地勢已得亟應激勵兵勇分投扼截出奇制勝並須兼顧
興安之防不得稍形疏懈如兵力不敷卽飛咨多隆阿劉蓉調撥
以資得力張集馨見權撫篆責無旁貸著卽督飭地方文武實力
防剿如有兵勇可撥並須撥赴商州要隘勿令寇氛四竄方爲不
負委任多隆阿前奏盤屋卽可得手何以至今尙無信息著卽嚴

飭穆圖善等設法攻克以便分兵勦洗髮逆若爲一隅所牽掣致令逆蹤擾及完善恐該大臣不能當此重咎也此股逆眾既有由河南南陽湖北襄陽一帶會齊之謠官文嚴樹森張之萬當各飭派出防兵實力遏截勿令闖入本境如能派兵出境會秦師夾擊更爲上策該督撫等其慎固封守兼顧鄰疆不得強分畛域見在張總愚一股尙未撲滅蘇克金馬隊非僧格林沁親自督率恐難得力皖北應辦事宜諒可就緒該親王必須移紮豫境方能盡殄狂氛肅清中土著卽趕緊區畫一俟皖事布置妥協後迅卽移師進剿以慰朝廷拯民水火之意將此由六百里諭知僧格林沁官文多隆阿嚴樹森張之萬劉蓉李雲麟並傳諭張集馨知之○命王憲來京以蘇廷魁署河南布政使

由候補道署

○辛未諭內閣爲政

之憂首在足食各直省州縣設立常平社倉所以爲未雨綢繆之

計者法至善也近來軍務繁興盜賊所至每以糧盡被陷總由各州縣恣意侵那以致守禦無資生民塗炭嗣後各省責成督撫大吏認真整頓廢者復之缺者補之未動之穀不得變價提用倘復任州縣侵漁虧缺定一併從重懲處○諭議政王軍機大臣等前因南岸各軍不敷分布曾經諭令曾國藩酌量情形調都興阿所部渡江協剿復因甘省回匪鴟張特命都興阿前赴綏遠城會同德勒克多爾濟辦理防務並令富明阿卽日前赴揚州接統所部扼守江北惟念都興阿老成持重久於行陣深得兵心此次奉令北行所部揚防兵勇非有諳練戎機之大員不能接統富明阿患病尙未銷假且北省需才正急將來尙有另行簡用之處自應趕緊遴選將才以備任使見在江北文武大員惟吳棠勦捻尙稱得力第伊久在清淮一帶督兵與揚防兵勇素不相習且恐該漕督

一離清河則徐宿一帶卽有鞭長莫及之慮吳棠可否令其接統都興阿所部若移紮揚州能否兼顧清淮之處著曾國藩酌覈具奏詹啟綸帶兵亦稱得力如令吳棠赴揚督兵能否駕馭得宜詹啟綸本任係徐州鎮總兵似可飭令赴任以重職守陳國瑞勇敢素著如令接統揚防或幫同吳棠辦理尙能融洽其能否獨當一面之處並著曾國藩查看迅速覆奏儻吳棠陳國瑞二員內均難調派卽著該大臣於所部各員內擇其謀勇兼全材能統眾者奏請派赴揚州接帶兵勇庶江北守禦不至空虚且與大江以南聯爲一氣至黑龍江馬隊非有諳習情形之大員不能統率都興阿前赴綏遠會辦防剿所有黑龍江馬隊卽可令其隨帶北來藉資得力其餘都興阿所部兵勇均著曾國藩仍遵前旨分別布置調派將此由六百里諭令知之○廣江蘇清河縣學額三名○是月

減免直隸安州等三州縣歉收上年額賦並緩本年糧租緩徵開
州等二十四州縣被水被旱被雹被蟲新舊額賦雜課江蘇高郵
等二十三州縣被水被旱漕糧暨折色銀兩泰州等二十八州廳
縣暨淮安等四衛被旱被兵新舊額賦租課太倉等三十三州廳
縣暨蘇州等五衛被擾舊欠額賦漕糧山東臨清等七十州縣暨
德州等四衛東平所屯莊被災被擾本年上忙額賦暨漕河倉課
展緩單縣上年被擾額賦並漕倉河銀